

L secret del lech de l'ercabuan

L'Istitut Ladin porta dant n nef spetàcol, per contèr la lejendes ladines con ator, museganc, e la ciantarina fascèna Noemi Iori. Pruma sun Gardecia en jebia ai 30 de messèl

N spetàcol che fae cognoscer la conties e la lejendes ladines e si personajes a na vida lijiera e gustégola ma no banala, adatèda a gregn e picoi, contèda per talian per se fèr entener dai ghesé, ma enterzèda da cianties per ladin e dal son de bela museghes dal vif. Chesta formula se aea jà desmostrà percacenta con "Laurin", portà dant da l'ator Andrea Brunello con la mùseghes del Canori lurèdes fora dal maester Gianfranco Grisi.

Sun chest filon l'Istitut Ladin de Fascia à enjignà per chest istà na produzion neva, che vegnarà portèda dant en jebia ai 30 de messèl da la does domesdi sun Gardecia, olache apontin ogne jebia l Museo mena picoi e gregn "dò l troi de la conties".

L nef spetàcol, dal titol "L secret del lech de l'ercabuan", endrezà en colaborazion con l'Azienda per l

Turism de Fascia, conta la storia de l'amor del strion per la vivèna del lech, con referimenc a temes e personajes de desvaliva lejendes leèdes al "Lech de la Tomèra" auter inom de tradizion de chel lech encantà, e del raion del Latemàr, e con espedienc naratives che se refèsc a "Il segreto del Bosco Vecchio" de Dino Buzzati.

I tesé é stac scric dal diretor de l'Istitut ladin Fabio Chiocchetti, e i vegn porté dant te chesta verscion per talian da l'ator Maurizio de Zanghi, ma enterzé da la cianties ladines, semper de Chiocchetti, portèdes dant da la ciantarina da Dèlba Noemi Iori: dò aer envià a ciantèr per ladin n personaje de nonzech desche Antonella Ruggiero, l'Istitut Ladin à volù donca ge dèr lèrga a na ousc joena de noscia val.

L spetàcol é compagnà da la bela mùseghes scrites aposta dal maester

Gianfranco Grisi, che tel spetàcol sona dal vif adum coi etres componenc de la sociazion musicala "Neuma". La oujes de ator, ciantarina e strumenc se enterza e se lea donca te chest spetàcol, che met adum conties de tradizion e temes che à valuta amò anchecondi, te na proponeta zenza età e semper viva, bona de encantèr picoi e gregn e de portèr l lengaz ladin sun neves troes espressives, desmostran sia vitalità e 'sia forza che pel jir ence sorafora i confins de noscia val.

La bela cornisc de Gardecia sarà ence chest an la cornisc spezièla de la neva proponeta de l'Istitut e del Museo Ladin, e se l temp no permet l spetàcol vegnarà portà dant da les 5 domesdi te sala grana de l'Istitut Ladin a Sèn Jan.

Chela medema dì, da les 21.30, Noemi Iori e Gianfranco Grisi col grop Neuma sarà a Moena ja "La

Grenz", olache i metarà dant vèlch ciantia del spetàcol e autra museghes del repertorie irlandeis del grop.

"L secret del lech de l'ercabuan vegnarà portà dant amò n'outa chest istà ai 20 de aost, e via per d'uton

l'é pervedù amò n spetàcol, chest'outa dut per ladin per noscia jent. Te chela ocajion l'Istitut Ladin darà fora ence n CD con duta la mùseghes e la cianties con la ousc de Noemi Iori. (lg)



Dò l suzess de "Laurin" con Andrea Brunello, l'Istitut à enjignà n spetàcol dut nef che porta dant la lejendes del lech de la Tomèra con narazion, musega e cianties.